



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Sumáriu Kazu
Tribunál Judisiál Primeira Instánsia Baukau
Outubru 2023

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Judisiál Primeira Instánsia Baukau

1. Totál kazu ne'ebé JSMP monitoriza: 13

| Artigu | Tipu Kazu | Númeru |
|---|--|--------|
| Artigu 145 Kódigu Penál (KP) & artigu 2, 3, no 35 letra (b), 36 Lei Kontra Violénsia Doméstika (LKVD) | Ofensa ba integridade fízika simples ho natureza violénsia doméstika (artigu 2 kona-ba conseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika (VD) sira no artigu 36 kona-ba krime sira violénsia doméstika nian hanesan krime públiku) | 7 |
| Artigu 145 Kódigu Penál (KP) no Artigu 20 (1), artigu 2 (2 alinea f) Lei Arma Brankas | Ofensa ba integridade fízika simples no arma brankas | 1 |
| Artigu 145 Kódigu Penál (KP) | Ofensa ba integridade fízika simples | 1 |
| Artigu 145 Kódigu Penál (KP) no artigu 258 Kódigu Penál (KP) | Ofensa ba integridade fízika simples no danus simples | 1 |

| | | |
|---|---|-----------|
| Artigu 207 KP | Kondusaun sein karta | 1 |
| Artigu 148 KP no Artigu 207 KP | Ofensa ba integridade física negligente no Kondusaun sein karta | 1 |
| Artigu 217 (1) Kódigu Penál (KP) no artigu 24 lei Nú.14/2017 no artigu 30, artigu 31 dekretu lei 6/2020 | Hasoru flora no fauna | 1 |
| | | 13 |

2. Totál desizaun ne'ebé JSMP monitoriza: 10

| Tipu desizaun | Artigu | Númeru |
|--|--------------|-----------|
| Suspensaun ba prizaun nia ezekusaun | Artigu 68 KP | 1 |
| Pena multa | Artigu 67 KP | 8 |
| Suspensaun ba prizaun nia ezekusaun no omologa dezisténsia keixa | Artigu 68 KP | 1 |
| Totál | | 10 |

3. Totál kazu sira ne'ebé adia tuir JSMP nia monitorizasaun: 0

4. Totál kazu ne'ebé sei kontinua prosesu tuir JSMP nia monitorizasaun: 3

B. Deskrisaun sumáriu jalgamentu ba desizaun kazu sira

1. Krime ofensa ba integridade física simples no arma brankas

Nú. Prosesu : 0034/20.LASIC
 Kompozisaun Tribunál : Koletivu
 Juis : Dra. Maria Modesta d. A. Viera no Dr. José António d. Escurial no Dra. Sribuana da Costa
 Prokuradór : Dr. Bartolomeu de Araujo
 Defeza : Dr. Albino de Jesus Pereira
 Desizaun : Pena prizaun tinan 3 suspende tinan 3

Iha 03 Outubru 2023, Tribunál Judisiál Premeira Instánsia Baukau prezide leitura akordaun ba krime ofensa ba integridade física simples no arma brankas ne'ebé envolve arguidu Lucas Marques da Silva hasoru lezadu Godinho da Costa no Estadu RDTL, iha Suku Fuluro, Postu Administrativu Lospalos, Munisípiu Lautein.

Akuzasaun prokuradór

Prokuradór akuza katak iha 13 Maiu 2020, iha oras tuku 11:30 dadeer, iha Motolori Suku Fuluro, iha tempu ne'ebá lezadu nia kolega naran Domingos de Asis husu arguidu katak nia mak naran "Lakama Lai" no jagoan iha Lore, nune'e sira baku malu kedas. Domingos de Asis konsege tuku arguidu niaibun, nune'e lezadu sa'e ba atu sori, arguidu hasai tudik ne'ebé antes ne'e iha pasta laran hodi sona kedas lezadu Godinho

da Costa nia liman kabun hetan kanek. Konsekuensia husi arguidu nia konduta, halo lezadu tenke baixa iha ospital Lospalos hodi halo tratamentu intensivu durante loron haat hafoin fila ba uma kontinua halo tratamentu iha uma durante semana rua foin rekupera fali.

Prokurador akuzo arguidu kontra artigu 145 KP kona-ba ofensa ba integridade fizika simples ho nia moldura penal to'o tinan 3 ka multa no artigu 20 (1), 2 (2 alinea h) husi lei Nú.5/2017 kona ba Lei Arma Brankas.

Prosesu tetantiva konsiliaun

Antes tama ba produsaun ba prova bazeia ba artigu 262 KPP kona-ba tentativa konsiliaun, tribunál halo tentativa konsiliaun ba arguidu ho familia husi lezadu relasiona ho krime ofensa ba integridade fizika simples hasoru lezadu, tanba kazu ne'e klasifika nu'udar krime semi-publiku no nia prosedimentu depende ba keixa.

Iha prosesu konsiliaun ne'e familia husi lezadu hakarak deziste nia keixa hasoru arguidu. Bazeia ba konkordansia husi parte rua ne'e, tribunál omologa tiha keixa ne'e. Entretantu ba krime arma brankas, tribunál kontinua ba prosesu julgamentu.

Produsaun ba prova sira

Iha prosesu julgamentu, arguidu deklara katak faktu sira iha akuzasaun ne'e loos hotu, arguidu deklara mos katak Domingos tuku duni arguidu niaibun. Bainihira lezadu atu ba sori sira maka arguidu foti sai tudik husi nia pasta laran no sona lezadu Godinho. Momentu ne'eba arguidu fila husi Lore atu ba Soru, maka hetan problema. Arguidu lori tudik tamba la'o tuir ai-laran, kuandu hetan hahan ruma karik ko'a ba han no arguidu deklara katak moris iha foho ne'e, sira sempre ka'er tudik ka katana hodi halo serbisu. Arguidu deklara mos katak hafoin sona lezadu Godinho, arguidu direta ba iha eskuadra polisia hodi presta deklarasan no tudik ne'e entrega kedas ba iha polisia. Arguidu ho lezadu sira di'ak malu ona.

Alegasaun final

Prokurador haktuir katak iha produsaun prova arguida konfesa faktu hotu, arguidu nia konduta ne'e priense krime arma brankas, tanba ne'e husu ba tribunál kondena arguidu ho pena minimu suspende ba periodu hanesan.

Enkuantu parte defeza iha nia alegasaun katak normalmente iha foho arguidu sira moris sempre uja tudik hodi halo servisu la'os foin uja. Nune'e defeza husu ba tribunál atu aplika pena suspensaun minimu ba arguidu.

Desizaun

Depoisde avalia faktu sira hotu, tribunál prova katak arguidu provadu uza tudik sona lezadu. Bazeia ba faktu provadu sira ne'e tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

2. Krime ofensa ba integridade fizika negligente no kondusaun sein karta

Nú. Prosesu : 0025/22.VQSTR
Kompozisaun Tribunál : Singulár
Juis : Dr. José António d. Escurial
Prokuradór : Dr. Bartolomeu de Araújo
Defeza : Dr. Albino de Jesus Pereira
Desizaun : Pena Multa US\$30.00

Iha 05 Outubru 2023, Tribunál Judisiál Primeira Intánsia Baukau prezide julgamentu leitura sentensa ba krime ofensa ba integridade fízika negligente no kondusaun sein karta ne'ebé envolve arguidu Afonso Soares hasoru lezadu Amortinho da Silva no Estado RDTL, iha suku Makadike, Postu Administrativu Uatulari, Munisípiu Vikeke

Akuzasaun prokuradór

Prokuradór akuza katak, iha 17 Agostu 2022, iha oras tuku 16:00 lokraik, arguidu konduz motorizada marka Honda Beat ho xapa matrikula M.9554 TL, fila husi futu manu atu ba nia uma. Bainhira to'o iha area Belula lezadu ne'ebé sei menoridade korta estrada nune'e arguidu la konsege kontrola motorizada nia velocidade ikus motorizada nia volante soke kona lezadu nia ulun rezulta lezadu monu tun iha estrada leten. Arguidu konduz motorizada desde 2008, maibé seidak iha karta kondusaun.

Konsekuensia nesesaria no direita husi arguidu nia hahalok, ne'ebe konduz motorizada sein karta kondusaun no la ho kuidadu, nune'e soke lezadu rezulta lezadu hetan kanek grave iha nia ulun, hasan, reen-toos, raan sai husi lezadu nia tilun no lezadu baixa semana rua iha HNGV.

Prokuradór akuza arguidu kontra artigu 148 KP kona-ba ofensa ba integridade fízika negligente ho nia moldura penál to'o tinan 3 ka multa no artigu 207 KP kona-ba kondusaun sein karta ho nia moldura penál to'o tinan 2 ka multa.

Antes tama ba produsaun ba prova, bazeia ba artigu 262 KPP kona-ba tentativa konsiliaun, tribunál halo tentativa konsiliaun ba arguidu ho família husi lezadu relasiona ho krime ofensa ba integridade fízika negligente hasoru lezadu, tanba kazu ne'e klasifika nu'udar krime semi-públiku no nia prosedimentu depende ba keixa.

Iha prosesu konsiliaun, família husi lezadu hakarak deziste nia keixa hasoru arguidu. Bazeia ba konkordansia husi parte rua ne'e, tribunál omologa tiha keixa ne'e. Entretantu ba krime kondusaun sein karta, tribunál kontinua ba prosesu julgamentu.

Produsaun ba prova sira

Iha prosesu julgamentu arguidu deklar katak faktu sira ne'e loos hotu. Hatutan katak arguidu kondus motorizada dezde tinan 2008 no tuir ona teste hamutuk dala rua maibé la pasa to'o agora.

Alegasaun finál

Prokuradór haktuir katak bazeia ba iha faktu sira ne'e iha indisiu suficiente katak arguidu provadu komete krime kondusaun sein karta. Tanba ne'e husu ba tribunal kondena arguidu ho pena multa US\$15.00.

Entretantu defeza akresenta katak arguidu konfesa ba faktu sira hotu iha akuzasaun, arguidu konsege tuir ezame dala rua maibe la pasa nafatin, arrepende nia hahalok no foin primeiraves mai hatan iha tribunál. Tanba ne'e husu ba tribunál aplika pena multa ba arguidu.

Desizaun

Depoisde avalia faktu sira hotu, tribunál prova katak arguidu kondus motorizada dezde tinan 2008, maibe la iha karta kondusaun.

Bazeia ba faktu provadu sira ne'e no tetu mos sirkunstansia atenuante sira hanesan arguidu konfesa, arrepende nia hahalok, foin primeiraves mai hatan iha tribunál. Nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu US\$1.00 kada loraun durante loraun 30. Tribunál mos fiksa pena alternativa durante loraun 20 prizaun, bainhira arguidu la kumpri pena multa refere.

3. Krime ofensa ba integridade física simples ho natureza violência doméstica

| | |
|----------------------|--------------------------------|
| Nú. Prosesu | : 0007/23. BCQLC |
| Kompozisaun Tribunál | : Singulár |
| Juis | : Dr. José António d. Escurial |
| Prokuradór | : Dr. Bartolomeu de Araújo |
| Defeza | : Dr. Albino de Jesus Pereira |
| Desizaun | : Pena multa US\$30.00 |

Iha 05 Outubru 2023, Tribunál Judisiál Primeira Instáncia Baukau prezide leitura sentensa ba krime ofensa ba integridade física simples ho natureza violência doméstica ne'ebé envolve arguidu AGdS hasoru nia feen, iha Munisípiu Baukau.

Akuzasaun Prokuradór

Prokuradór akuza katak, Iha 26 Marsu 2023, iha oras tuku 20:00 kalan, arguidu tebe dala tolu iha lezada nia kotuk laran, arguidu foti ai-pedasuk baku dala dala ida iha lezada nia kotuk laran halo lezada monu tun ba rai hafoin dulas lezada nia kakorok rezulta lezada nia kakorok moras. Antes agresaun ne'e, arguidu ho lezada diskute malu kona-ba arguidu ta'a kotu sira nia lakeru ne'ebé fuan dadauk rezulta lakeru mate, nune'e lezada koalia kona-ba arguidu nia asaun ne'e ho nune'e mosu agresaun.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penal to'o tinan 3 ka multa konjuga ho artigu 2, 3 (a) no ,35 (b) LKVD.

Produsaun ba prova sira

Iha prosesu julgamentu, arguidu deklara katak faktu sira loos hotu. Arguidu mós deklara katak altura ne'eba arguidu tesi kotu duni lakeru, tanba ne'e lezada koalio barak ho nune'e mosu agresaun ne'e. Arguidu mós deklara katak agora sira di'ak malu fali ona no sei la baku tan lezada.

Alende ne'e, lezada kontinua komfirma faktu hotu iha akuzasaun no deklara katak depoisde akontesimentu ne'e polisia mak lori lezada ba halo tratamentu iha Sentru Saúde Quelekai no lori mós lezada ba iha uma-mahon no liutiha lora balu lezada fila fali ba sira nia uma, sira diak malu no dame malun ona no agora moris hamutuk nafatin hanesan feen ho la'en.

Alegasaun finál

Prokuradór konsidera arguidu provadu komete krime hasoru lezada, bazeia ba konfisaun arguidu nian no komfirma mós husi lezada, Tanba nee husu ba tribunál atu kondena arguidu ho pena multa.

Entertantu parte defeza iha nia alegasaun husu ba tribunál hodi decide tuir faktu sira ne'ebé arguidu komete.

Desizaun

Depois avalia faktu sira hotu, tribunál prova katak arguidu tebe dala tolu iha lezada nia kotuk laran, arguidu foti ai-pedasuk baku dala dala ida iha lezada nia kotuk laran halo lezada monu tun ba rai hafoin dulas lezada nia kakorok rezulta lezada nia kakorok moras.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfensa, arrepende ninia hahalok, foin primeirafés mai hatan iha tribunál. Nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei seluk US\$1 kada lora durante lora 30. Tribunál mós fiksa pena alternativa durante lora 20 prizaun, bainhira arguidu la kumpre pena multa refere.

4. Krime ofensa ba integridade física simples ho natureza violénsia doméstika

| | |
|----------------------|--------------------------------|
| Nú. Prosesu | : 0008/23.BCQLC |
| Kompozisaun Tribunál | : Singulár |
| Juis | : Dr. José António d. Escurial |
| Prokuradór | : Dr. Bartolomeu de Araújo |
| Defeza | : Dr. Albino de Jesus Pereira |
| Desizaun | : Pena multa US\$30.00 |

Iha 05 Outubru 2023, Tribunál Judisiál Primeira Intánsia Baukau prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu CS hasoru nia feen, iha Munisípiu Baukau.

Akuzasaun prokuradór

Prokuradór akuza katak iha 14 Abril 2023, iha oras tuku 10:00 dadeer, arguidu tuku dala ida iha lezada nia matan parte loos, basa dala tolu iha lezada nia hasan parte loos. Antes agresau ne'e arguidu ho lezada diskute malu kona-ba lezada husu nia osan US\$3.00 ba arguidu, ho nune'e mosu agresau ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa konjuga ho artigu 2, 3 (a), 35 (b) no 36 LKVD.

Produsaun ba prova sira

Iha prosesu julgamentu arguidu deklara katak mosu diskusaun kona-ba lezada husu osan arguidu hirus tuku dala ida iha lezada nia matan parte loos, basa dala tolu iha hasan parte loos, forma família iha tinan 2022, foin primeiravés baku lezada no arrepende ninia hahalok.

Alende ne'e lezada kontinua konfirma faktu hotu iha akuzasaun, lezada mós deklara katak depoisde akontesementu ne'e sira di'ak malu ona no to'o agora arguidu la baku ona lezada.

Alegasaun finál

Prokuradór haktuir katak iha produsaun ba prova arguidu konfesa faktu hotu no konfirma mós husi lezada, nune'e prokuradór konsidera arguidu nia aktu ne'e priense krime ofensa ba integridade fízika simples ho natureza violénsia domestika, sira moris hamutuk nafatin hanesan feen ho la'en, tanba ne'e husu ba tribunál atu kondena arguidu ho pena prizaun lora tolu nulu suspende ba tinan ida.

Entertantu parte defeza iha nia alegasaun entrega ba tribunál atu desidi tuir faktu ne'ebé akuza ba arguidu.

Desizaun

Depoisde avalia faktu sira hotu, tribunál prova katak arguidu tuku dala ida iha lezada nia matan parte loos, basa dala tolu iha lezada nia hasan parte loos.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, di'ak malu ona ho lezada, arrepende nia hahalok, foin primeiravés komete krime hasoru lezada. Nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu US\$1.00 kada lora durante lora 30. Tribunal mós fiksa pena alternativa durante lora 20 prizaun, bainhira arguidu la kumpri pena multa refere.

5. Krime hasoru flora no fauna

Nú. Prosesu : 0014/22.LASIC
Kompozisaun Tribunál : Singulár
Juis : Dra. Sribuana da Costa
Prokuradór : Dr. Bartolomeu de Araújo
Defeza : Dr. Albino de Jesus Pereira
Desizaun : Pena multa US\$40.00

Iha 17 Outubru 2023, Tribunál Judisiál Primeira Instáncia Baukau prezide leitura sentensa ba krime hasoru flora ho fauna ne'ebé envolve arguidu Mario Ximenes no Cornelis dos Santos Tilman hasoru Estadu RDTL, iha Suku Lore, Postu Administrativu Lospalos, Munisípiu Latein.

Akuzasaun prokuradór

Prokurador akuza katak, iha 14 Juñu 2022, iha oras tuku 09:00 dadeer, arguidu ne'ebé la identifikadu kontaktu arguidu Mario atu ba sosa nia ai-kameli ne'ebé fa'an iha Lore.

Tuir mai iha 15 Juñu 2022, iha oras tuku 16:00 lokraik, arguidu Mario Ximenes husu ajuda ba arguidu Cornelis dos Santos Tilman atu ba tula ai-kameli, nune'e arguidu Cornelis konduz nia motor Mio Yamaha Xeoan ho númeru matrikula E 6000 TIs, tula arguidu Mario no sira nain rua aranka husi sira nia uma iha Pune ba Lore. Iha oras tuku 19:00 kalan, arguidu sira to'o iha Lore hodi hasoru malu ho arguidu deskoñesidu ne'ebé tau hamutuk tiha ona ai-kameli iha estrada nune'e arguidu na'in rua hamutuk ho arguidu deskoñesidu hamos ai-kameli sira ne'e depois tetu ho todan lima nulu (50) kg no arguidu Mario sosa kada kg ho osan US\$12.00 nune'e total US\$600.00. Arguidu Mario fo tiha osan ba arguidu deskuñesidu, sira hamutuk halo'ot ai-kameli refere iha saku haat no tula ba motor leten depois arguidu nain rua mós sae motor no aranka. Bainhira arguidu nain rua to'o iha dalan area Chai hasoru malu ho Delfin ho nia motor Yamaha Mio ho nú matrikula N 9257 TIs no Mateus ho motor nú matrikula O 7627 TIs, nune'e arguidu Cornelis no arguidu Mario husu ajuda ba Delfin no Mateus atu tula saku ai-kameli tanba ai-kameli todan liu. Nune'e Delfin tula ai-kameli saku ida no Mateus tula saku ida, bainhira to'o iha Aldeia Lipa, Suku Lore II mak Guarda Florestal halo pasa revista hodi hetan no imediatu halo aprensaun.

Prokuradór akuza arguidu kontra artigu 217 KP kona-ba hasoru flora no fauna ho moldura penal too tinan 3 ka multa no kontra Lei nú 14/2017 no Dekretu Lei nú 6/2020.

Produsaun ba prova sira

Iha produsaun prova arguidu Mario deklara katak, simu telefone husi ema deskoñesidu atu ba sosa ai-kameli, nune'e arguidu sosa duni ai-kameli iha ema deskonesidu kada kg US\$12.00, arguidu kontaktu arguidu Cornelis sira nain rua ba tula ai-kameli, iha dalan hasoru Delfin ho Mateus ajuda tula mos ai-kameli hafoin to'o iha iha dalan Guarda Florestal halo pasa revista hetan no foti ai-kameli refere. Antes arguidu mós fa'an duni ai-kameli ba iha kompañia ida husi Dili kada kg US\$17.00. Arguidu Cornelis

deklara katak arguidu Mario mak kontaktu nia atu ba tula maibé la hatene ema ne'ebé faan ai-kameli ba arguidu Mario.

Testemuña Mateus Pinto depoimenta katak, testemuña ho Mateus nu'udar peskador ba hodi haree tasi atu husik redi ba tasi laran no fila husi tasi mak hasoru arguidu sira no husu ajuda atu tula sasan refere nune'e testemuña sira tula, bainhira to'o iha dalan klaran derepente polisia no Guarda Florestal halo pasa revista mak hetan sasan refere ai-kameli maibé antes testemuña sira la hatene katak sasan sira tula ne'e ai-kameli.

Testemuña Modesto Sarmiento nu'udar Guarda Florestal Suku Lore II katak simu telefone husi nia kolega dehan ema oin foun tama iha Suku Lore II deskonfia foti ai-kameli, testemuña hamutuk ho nia maluk Guarda Florestal nain tolu hein iha dalan halo pasa revista ba arguidu sira mak hetan ai-kameli iha arguidu sira nia saku.

Alegasaun finál

Prokuradór haktuir katak iha produsaun prova arguidu Mario konfesa faktu ne'ebé inputa ba nia, arguidu Cornelis hetan kontaktu husi arguidu Mario ba ajuda tula de'it, arrepende sira nia hahalok, arguidu Mario antes ne'e iha tinan 2014, komete ona krime hasoru flora no fauna hetan disizaun pena suspensaun, ho razaun hirak ne'e husu atu kondena arguidu sira ho pena prizaun fulan ida suspende ba tinan ida.

Enkuantu defeza haktuir katak bazeia ba produsaun ba prova parte defeza konkorda prokuradór nia alegasaun.

Desizaun

Depoisde avalia faktu sira hotu, tribunál konsidera faktu hotu provadu, bazeia ba faktu provadu sira ne'e no tetu mós ho sirkunstánsia atenuante sira hanesan arguidu Mario konfesa integralmente, kolabora mós ho tribunál no arguidu Cornelis mós konfesa integralmente. Nune'e tribunál konklui prosesu ne'e no kondena arguidu sira ho pena multa US\$40.00 ne'ebé arguidu sira sei sel 0.50 sentavus kada loron durante loron 80. Tribunál mós fiksa pena alternativa durante loron 60 prizaun, bainhira arguidu la kumpri pena multa refere.

6. Krime kondusaun sein karta

| | |
|----------------------|----------------------------------|
| Nú. Prosesu | : 0018/22.VQSTR |
| Kompozisaun Tribunál | : Singulár |
| Juis | : Dra. Maria Modesta d. A. Viera |
| Prokuradór | : Dr. Bartolomeu de Araújo |
| Defeza | : Dra. Laura Valente Lay |
| Desizaun | : Pena Mula US\$30.00 |

Iha 23 Outubru 2023, Tribunál Judisiál Primeira Instánsia Baukau prezide leitura sentensa ba krime kondusaun sein karta ne'ebé envolve arguidu David Anacleto Franco de Araújo da Silva hasoru Estadu RDTL, iha Munisípiu Vikeke.

Akuzasaun prokuradór

Prokuradór akuza katak iha 01 Juñu 2022, iha oras tuku 19:00 kalan, arguidu konduz motorizada ho xapa matrikula B.6763.TL hosi diresaun Olobai atu ba Merkadu Vikeke. Maibé kuandu halai to'o iha ponte arguidu imediata halai sa'e ba iha merkadu nian, nune'e kontra sinais tranzitu hafoin arguidu soke no monu tun ba estrada, motivu tamba arguidu konduz motor ho kondisaun lanu. Iha tinan barak ona arguidu konduz motorizada maibé la iha karta kondusaun no motorizada ne'ebé arguidu konduz ne'e mós la iha dokumentus. Prokuradór akuza mós katak konsekuensia nesesaria no direta husi arguidu nia hahalok ne'e bele hamosu perigo ba comunidade sira ne'ebé utiliza estrada públiku refere.

Prokuradór akuza arguidu kontra artigu 207 KP kona-ba krime kondusaun sein karta ho nia moldura penal loron 30 to'o tinan 2 ka multa.

Produsaun ba prova sira

iha prosesu julgamentu arguidu deklar katak rekuñese konduz motor la iha karta kondusaun, arguidu ho kondisaun lanu halai kontra sinais, motor nia dokumentu inklui arguidu nia dokumentu seluk momentu inundasau iha tinan 2019 iha Dili mak be estraga hotu dokumentu refere. Motor agora sei Polísia Eskuadra PNTL Vikeke.

Alegasaun finál

Prokurador haktuir katak arguidu konfesa uza motor la iha karta kondusaun no halai kontra sinais, nune'e prokuradór konsidera arguidu provadu komete krime kondusaun sein karta. Tanba ne'e husu ba tribunál atu kondena arguidu ba pena multa US\$30.00. Bainhira arguidu apresenta ona dokumentu komprovativu kona-ba motor nian mak foin fó fila arguidu nia motor.

Alende ne'e parte defeza haktuir katak, bezeia ba produsaun ba prova, arguidu konfesa katak nia konduz motorizada kontra duni sinais tranzitu no la iha karta kondusaun. Nune'e defeza husu ba tribunál atu aplika pena multa mínimu ba arguidu no husu ba tribunál restitui fila fali motorizada ba arguidu.

Desizaun

Depoisde avalia faktu sira hotu, tribunál prova katak arguidu konduz motor la iha karta kondusaun.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál. Nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu 0,50 sentavus kada loron durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere. Enkuantu kona-ba motorizada arguidu bele foti ona, maibé tenke lori dokumentu komprovativu sira. Prazu durante loron neen nulu, liuhusi ida ne'e sei a favor ba estadu.

7. Krime ofensa ba integridade fízika simples ho natureza violénsia doméstika

Nú. Prosesu : 0174/23.PCCIC

Kompozisaun Tribunál : Singulár
Juis : Dr. Jose Antonio d. Escurial
Prokuradór : Dr. Bartolomeu de Araújo
Defeza : Dr. Germano Guterres Ramos
Desizaun : Pena multa US\$22.50

Iha 24 Outubru 2023, Tribunál Judisiál Primeira Instánsia Baukau prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu SFS hasoru nia feen, iha Munisípiu Baukau.

Akuzasaun prokuradór

Prokuradór akuza katak iha 26 Marsu 2023, iha oras tuku 16:30 lokraik, arguidu basa dala tolu iha lezada nia hasan parte karuk, uza ai-sar baku dala rua iha lezada nia kotuk laran, arguidu kontinua kaer lezada nia fuuk hodi rasta sai husi uma laran ba liur rezulta lezada nia ulun no isin moras. arguidu hateten ba lezada katak "*o hateten ba se de'it hau la ta'uk*". Antes agresaun ne'e, arguidu ho lezada diskute malu kona-ba lezada husu osan ba arguidu atu sosa labarik nia sasan tanba lezada besik atu partus maibé arguidu hatan dehan lokraik deit, maibé to'o lokraik arguidu la fó lezada husu nafatin, ho nune'e mosu agresaun ne'e. Depoisode akontesimentu ne'e arguidu ho lezada la hela hamutuk ona.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa konjuga ho artigu 2, 3 (a), 35 (b) no 36 LKVD.

Produsaun ba prova sira

Iha prosesu julgamentu arguidu deklara katak komete aktu ne'e hasoru lezada, tanba deskonfia lezada amante ho mane seluk, arguidu deklara tan katak iha akontesimentu ne'e arguidu basa deit iha lezada nia hasan no arguidu la uza ai-sar baku lezada no la dada lezada nia fuuk. Forma família iha tinan 2016, foin primeiravés komete krime hasoru lezada, arrepende nia hahalok no di'ak malu ona ho lezada.

Iha parte seluk lezada kontinua konkonfirma faktu hotu iha akuzasaun no deklara katak la amante (*selingkuh*) ho mane seluk. Lezada deklara tan katak lezada nu'udar arguidu nia feen dataoluk. Depoisode akontese lezada ba tiha Dili maibé arguidu ba tuir lezada no sira di'ak malu ona too agora arguidu la baku ona lezada.

Alegasaun finál

Prokuradór akuza katak arguidu prátika krime ofensa ba integridade fízika simples ho natureza violénsia doméstika, mezmú arguidu deklara parsialmente maibé lezada konfirma faktu hotu iha akuzasaun, atu prevene arguidu nia konduta iha futuru tanba arguidu iha feen hamutuk nain tolu, razaun hirak ne'e husu ba tribunál atu kondena arguidu ho pena prizaun fulan tolu suspende ba tinan ida.

Entretantu defeza haktuir katak arguidu deklara deit faktu ne'ebé nia komete, arrepende nia hahalok, di'ak malu ona ho lezada no foin primeiravés komete krime no arguidu mak úniku responsabilidade ba família inklui arguidu nia feen primeira no sigundu.

Desizaun

Depoisde avalia faktu sira hotu, tribunál prova katak arguidu basa dala tolu iha lezada nia hasan parte karuk, arguidu uza ai-sar baku dala rua iha lezada nia kotuk laran, arguidu rasta lezada nia fuuk.

Bazeia ba faktu provadu sira ne'e no tetu mós sirkunstánsia atenuante sira hanesan foin primeiravés mai hatan iha tribunál, di'ak malu ona, arrepende ninia hahalok nune'e tribunál konklui prosesu ne'e no kondena arguidu ho ho pena multa US\$22.50 ne'ebé arguidu sei selu 0,50 sentavus kada loron durante loron 45. Tribunál mós fiksa pena alternativa durante loron 30 prizaun, bainhira arguidu la kumpri pena multa refere.

8. Krime ofensa ba integridade física simples ho natureza violéncia doméstika

Nú. Prosesu : 0011/23.BCQLC
Kompozisaun Tribunál : Singulár
Juis : Dr. José António d. Escurial
Prokuradór : Dr. Remizia de Fatima
Defeza : Dr. Antonio Fernandes
Desizaun : Pena multa US\$30.00

Iha 24 Outubru 2023, Tribunál Judisiál Primeira Instánsia Baukau prezide leitura sentensa ba kazu ofensa ba integridade física simples ho natureza violéncia doméstika ne'ebé envolve arguidu JF hasoru nia feen, iha Munisípiu Baukau.

Akuzasaun prokuradór

Prokuradór akuza katak iha 01 Maiu 2023, iha oras tuku 12:00 meuidia, arguidu basa dala ida iha lezada nia hasan parte loos no basa dala ida iha lezada hasan parte karuk. Antes agresaun ne'e, arguidu ho lezada diskute malu kona-ba bainhira arguidu fila husi serbisu, hamlaha atu han maibé modo la iha no viziñu mak fó fali etu no modo hodi arguidu han.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa konjuga ho artigu 2, 3 (a), 35(b), 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklara katak Depoisde akontese di'ak malu ona, arrepende nia hahalok no dezde forma família iha tinan 1990, foin primeiravés halo agresaun hasoru lezada.

Alende ne'e, lezada konfirma faktu hotu iha akuzasaun no deklara mós katak depoisde akontese sira di'ak malu ona to'o agora arguidu la baku ona lezada.

Alegasaun finál

Prokuradór haktuir katak akuzasaun prokuradór prosedente provadu tanba arguidu provadu komete krime ne'ebé akuza ba arguidu, moris hamutuk kuaze tinan tolu nulu ona maibé arguidu foin primeiravés komete krime hasoru lezada. Tanba ne'e husu ba tribunál atu aplika pena ne'ebé justu ba arguidu.

Entretantu defeza haktuir katak, arguidu konfesa, arrepende nia hahalok no moris hamutuk kleur foin primeiravés komete krime hasoru lezada, ho nune'e husu ba tribunál atu aplika pena ne'ebé justu ba arguidu.

Desizaun

Depoisde avalia faktu hotu, tribunál prova katak arguidu basa dala ida iha lezada nia hasan parte loos no basa dala ida iha lezada hasan parte karuk.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok nune'e tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu US\$1.00 kada loron durante loron 30. Tribunál mós fiksa pena alternativa ba arguidu durante loron 20 prizaun, bainhira arguidu la kumpri pena multa refere.

9. Krime ofensa ba integridade fizika simples ho natureza violénsia doméstika

| | |
|----------------------|--------------------------------------|
| Nú. Prosesu | : 0046/22.VQVQQ |
| Kompozisaun Tribunál | : Singulár |
| Juis | : Dra. Maria Modesta d. A. Viera |
| Prokuradór | : Dr. Bartolomeo de Araújo |
| Defeza | : Dr. Grigório Maria Lourdes de Lima |
| Desizaun | : Pena multa US\$45.00. |

Iha 19 Outubru 2023, Tribunál Judisiál Primeira Instánsia Baukau prezide julgamentu produsaun prova ba kazu ofensa ba integridade fizika simples natureza violénsia doméstika ne'ebé envolve arguidu JFG hasoru nia feen, iha Munisípiu Vikeke.

Akuzasaun prokuradór

Prokuradór akuza katak, Iha 26 Setembru 2022, iha oras tuku 08:00 dadeer, arguidu basa dala tolu iha lezada nia matan parte karuk tuku dala ida iha lezada nia liman kabun no kontinua foti ai-sanak baku dala rua iha lezada nia liman parte loos.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa konjuga ho artigu 2, 3, 35 (b) no 36 LKVD.

Produsaun ba prova sira

Iha prosesu julgamentu, arguidu deklara katak faktu hotu iha akuzasaun ne'e loos hotu. Depoizde akontese sira di'ak malu ona, arrepende ona ninia hahalok no foin primeiravés mai hatan iha tribunál.

Alende ne'e lezada kontinua konfirma faktu hotu iha akuzasaun no deklara katak depoizde akontesementu ne'e lezada ba ható'o keixa iha polísia no kontinua ba halo tratamentu iha iha sentru saúde no baixa durante kalan ida. Diak malu ona to'o agora la baku ona lezada.

Alegasaun finál

Prokuradór haktuir katak, iha produsaun prova arguidu konfesa no lezada konfirma faktu hotu iha akuzasaun, lezada grávida fulan hitu foti telemovel atu kontaktu inan-aman no fó hanoin mós ba arguidu kona-ba lezada nia grávida, arguidu nia konduta ne'e priense krime ofensa ba integridade física simples ho natureza violénsia doméstika, ho razaun hirak ne'e husu ba tribunál atu kondena arguidu ho pena prizaun suspende ninia ezekusaun.

Etrentantu defeza husu ba tribunál atu kondena arguidu ho pena ne'ebé adekuadu ho konsiderasaun katak, arguidu konfesa, arrepende nia hahalok no foin primeiravés mai hatan iha tribunál.

Desizaun

Depoizde avalia faktu hotu, tribunál prova katak arguidu basa dala tolu iha lezada nia matan parte karuk tuku dala ida iha lezada nia liman kabun no kontinua foti ai-sanak baku dala rua iha lezada nia liman parte loos.

Bazeia ba faktu ba faktu provadu sira ne'e no tetu mós ho sirkunstánsia atenuante sira hanesan arguidu konfesa, di'ak malu ona, arrepende nia hahalok no foin primeiravés mai hatan iha tribunál. Nune'e, tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu 0.50 sentavus kada lora, durante lora 90. Tribunál mós fiksa pena alternativa durante lora 60 prizaun, bainhira arguidu la kumpri pena multa refere.

10. Krime ofensa ba integridade física simples ho natureza violénsia doméstika

| | |
|----------------------|--------------------------------------|
| Nú. Prosesu | : 0106/23.BCBCV |
| Kompozisaun Tribunál | : Singulár |
| Juis | : Dra. Maria Modesta d. A. Viera |
| Prokuradór | : Dr. Bartolomeo de Araújo |
| Defeza | : Dr. Grigório Maria Lourdes de Lima |
| Desizaun | : Pena multa US\$22.50 |

Iha 25 Outubru 2023, Tribunál Judisiál Primeira Instánsia Baukau prezide leitura sentensa ba kazu ofensa ba integridade física simples ho natureza violénsia doméstika ne'ebé envolve arguida FG hasoru nia la'en, iha Munisípiu Baukau.

Akuzasaun prokuradór

Prokuradór akuza katak iha 08 Juñu 2020, iha oras tuku 12:00 meiodia, lezadu fila husi merkadu sosa ho tali to'o uma arguida husu tuir kona-ba tali refere lezadu hatan katak tali ne'e atu uza kesi bibi, lezada hatan fali hodi dehan "*ó nia bibi la iha, ó nia fahi la iha no ó nia uma la iha no tolok lezadu dehan*". Arguida tuku dala ida iha lezadu nia ulun, tuku dala ida iha lezada nia kabaas parte karuk, lezadu halai sai husi uma laran ba liur arguida duni tuir lezadu hodi tuda ho fatuk dala rua no kona iha lezadu nia liman parte karuk no tuda kona lezadu nia ulun parte karuk. Lezadu ba halo tratamentu iha ospital durante semana ida mak foin rekopera. Depoisde akontesementu ne'e sira moris separa ona no lezadu ba hela iha Quelikai.

Prokuradór akuza arguida kontra artigu 145 KP kona-ba ofensa ba integridade física simples ho nia moldura penal to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguida deklara katak faktu iha akuzasaun ne'e loos hotu inklui tolok mós loos maibé arguida la duni lezadu sai husi uma, arrepende nia hahalok, foin primeiravés mai hatan iha tribunál depoisde akontese seidak di'ak malu maibé arguida konsidera lezadu nafatin nia la'en mezmu sira hela separa ona no prontu simu lezadu nu'udar nia la'en.

Alende ne'e, lezadu kontinua konfirma faktu hotu iha akuzasaun no deklara katak depoisde akontese lezadu ba hela ketak ona iha Quelikai no lezadu mós prontu fila ba nia feen no kontinua moris hamutuk nu'udar feen ho la'en.

Alegasaun finál

Prokuradór haktuir katak iha produsaun ba prova arguida konfesa faktu hotu iha akuzasaun entretantu lezadu konfirma faktu iha akuzasaun nune'e arguida provadu komete krime ne'ebe inputa ba nia atu prevene arguida ninia hahalok iha futuro. Husu ba tribunál atu kondena arguida pena suspensaun minumu husi krime refere

Entretantu defeza haktuir katak bazeia ba produsaun prova ne'ebé produs iha audénsia julgamentu hanesan arguidu konfesa ka kolabora ho tribunál no difikulta tribunál atu hetan verdade iha prosesu ne'e, arrepende nia hahalok, foin primeiravés mai hatan iha tribunal. Tanba ne'e husu ba tribunál atu aplika pena ne'ebé adekuadu ba arguidu.

Desizaun

Depoisde avalia faktu hotu, tribunál prova katak arguida tuku dala ida iha lezadu nia ulun, tuku dala ida iha lezada nia kabaas parte karuk, lezadu halai sai husi uma laran ba liur arguida duni tuir lezadu hodi tuda ho fatuk dala rua no kona iha lezadu nia liman parte karuk no tuda kona lezadu nia ulun parte karuk.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál. Ho nune'e tribunál konklui prosesu ne'e no kondena arguida ho pena multa US\$22.50

ne'ebé arguida sei selu 0,50 sentavus kada lora durante lora 45. Tribunál mós fiksa pena alternativa durante lora 30 prizaun, bainhira arguida la kumpri pena multa refere.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl